

四庫全書

集部

欽定四庫全書

香山集卷六

宋 喻良能 撰

五言律詩

次韻外舅黃虞卿為愛山園好八首

為愛山園好
芒屨步步高
綠針擣露韭
碧箸翦春蒿
但得林泉趣
誰能州縣勞
何慚王孝伯
痛飲讀離騷
為愛山園好
芳籬占一涯
自耘三徑草
不斷四時花
柳絮風中雪
芙蓉水上霞
銀潢何處是
不擬問仙槎

為愛山園好年年草色新醉眠歌柳幄吟坐俯苔茵
栗里風煙古樊川花木春誰云無伴侶對影共三人

為愛山園好都無塵世喧穗禾臨芟沼繩草對苔垣
去就隨佳醞窮通付寓言還同李長吉來過有高軒

為愛山園好蕭齋竹逕通疎簾捲雌霓曲檻倚雄風
愛酒杜陵老煎茶桑苧翁菟裘真得計蹤跡免飄蓬

為愛山園好投閒日日來花時長夜飲雪後煖寒杯
一逕松篁影滿畦桑柘栽未能湖海去幽興亦悠哉

為愛山園好林塘十畝寬
露深花臉濕春淺柳眉攢
只擬希高隱那能縛小官
壽山誰問訊太白正蚪蟠
為愛山園好紅塵半點無
自應成小隱誰復嘆將蕪
香秣五十畝黃柑二百株
何必隨俯仰歸去亦良圖

次韻劉淳叟見寄二首

九萬垂雲翼胡為乃倦飛
丘園聊偃息巖阜故因依
蝶翅新酣睡鷗馴久息機
祇應與風景相賞莫相違
出處雙青鬢生涯一釣舟
淺深山遠近濃淡樹稀稠
隱

几畫逾靜捲簾春更幽何當乘興去艤棹向汀洲

次韻李直小疾初愈見寄

睽違纔一日懷想似三秋忽得五字句真成百不憂荷
花要同賦竹徑擬清游明夜月華滿杖藜能過不

二月二日大雪

磬湖二月雪寒氣故裴回麴市連天合銀花照眼開送

窮窮不去

俗以正月二十九日送窮二月二日為迎富

招隱隱難來幸有麴

生在何妨畧耻壘

遣興

山園近寒食春事總芳菲
風暖鶉鴝語日長蝴蝶飛
花光明醉眼草色淨塵衣
自足家居樂為生未覺非

昔忝郡文學今為宗子師
政懷三釜樂那復四愁詩
時服光搖目香杭滑溜匙
唯應講風雅儻可解人頤

伯兄由臨海歸省出示近詩次韻奉別

相別既四載相看如友生
未成投轄飲先作倒衣迎
夜雨方同聽秋風又獨行
不堪分手處霜重鴈行輕

重九會飲愛山堂

閒居愛重九，賒酒對黃花。
水榭杯盤瑩，家人笑語譁。
官情薄，秋靄吟思繞晴霞。
何晚歸途好，飄飄醉帽斜。

乏酒

搖落偏悲客，清寒易中人。
寂寥那自守，淡泊亦殊真。
浮俗仍皆醉，虛談浪飲醇。
高歌傲燕市，忽憶重千鈞。

五舅處士惠訪小園作詩為謝

五舅多道氣，相過茹杞苗。
意行隨綠徑，情話竟清宵。
送

酒飛花急撩人鳥語嬌不堪分手處風雨晚瀟瀟

海上作

晴浪空仍白雲峰遠更青乾坤幾萬里聚落一浮萍自
昔聞溟渤從今小洞庭端如初發覆坐覺病眸醒

再用彛公長老韻贈嗣宗教授

居易青衫舊安仁素髮新愁思中酒聖貧忍論錢神白
也詩誰敵潮乎筆更親生辰宿南斗同是數奇人

疊嶂寒溪硯屏

疊嶂千重秀寒溪十里清
漁舟朝欵乃樵斧晝敲鏗
窈窕疑身到幽奇訝筆精
蕭齋凝睇久坐覺世情輕

次韻何茂恭永新見寄之什

起家從吏役寧為食無魚
游樂廢山澤懷歸畏簡書
文章簿領外風采折腰餘
卧轍從茲始為謀未覺疎
尺書將遠意飄忽渡江湖
嘉楮藤溪少纖毫月窟無
封題煩妙札沾丐到迂儒
多謝相思切迢迢千里途

立秋日迂宣諭中丞奉懷宋嗣宗

繡斧離朝右羸驂走道周
侵星宵不寐曝日夕初休天
地方炎暑山林漫早秋
廣文官舍靜應念汗交流

試院九日次王茂材丞公韻
兼呈翁沂伯廣文
秋杪仍新霽天涯憶故鄉
少陵三坐客太白兩重陽
深院日復日寒花黃未黃
昔年吹帽飲今日讀書牀

筠溪

精舍仍幽處深溪冒淺簷
寒聲隨浪起翠影共流長
斷岸通秋月虛簷受夏涼
雖無杜陵韻絕勝贊公房

二月五日夜夢何茂恭論詩

不見水曹久相思亦已勤夢中不識路樽酒細論文家
食甘春齋官居采泮芹何時真會面風月與平分

挽鹽官縣丞何公

先子生辛未齊年見此翁從容六紀內隱約古人風教
子從書積延賓畏酒空階前桃杏色依舊入簾紅

夜夢亦好園

薄宦思歸切天涯秋氣深一番南國夢千里故園心歷

歷湖邊路悠悠沙上禽橫枝清絕處何日復追尋

聞東嘉王公得雜學士喜而成篇

四海王夫子精忠簡冕旒詔綸飛渙渥禁閣要名流江
左思安石朝端欠武侯命珪兼召節蚤晚到南州

由真隱至枕峰寺

南國清秋杪長林翠靄重嬾黃千頃稻深碧萬株榕峽
水風前急

西峽渡名

方山雨後濃征鞍何所憩蕭寺枕孤峰

野外初涼冷征衫亦未重檀藥溪上竹勃窣道邊榕秋

意撩人切嵐光潑眼濃更尋天竺寺却憶此高峰

題雪峰寺

蘭若接閩天登臨意豁然樓臺秋色裏鐘梵暮雲邊
未遂遊山興聊為借榻眠白頭仍捧檄奔走只堪憐

八月十六夜月

一更山吐月萬里湛虛明聊當中秋色堪欣此夜情
西風金盞側香霧玉簪橫却憶青蓮語寒鴉棲復驚

送廣漕曾郎中赴闕奏事

綠鬢懷中詔清秋向上都聖圖方廣大賢路不崎嶇會
見除清切寧須復轉輸公如任風憲扞劾莫踟蹰

侍太孺人由安國過賢沙至鳳池

板輿多樂事沙路及晴時約畧瞻龍卧逶迤到鳳池匏
樽細斟酌華髮足遨嬉此意安仁解曛酣更賦詩

山陰

綠髮經行處重來兩鬢絲共誰論舊事何處有新詩鑑
水春妍蚤蘭亭雪意遲邦人爭指似壽母近期頤

禹帝祠有序

余往來越中廿五年未嘗不致疑於禹陵以
龍瑞之禹穴為是耶則其大曾不盈咫以告
成之窆石為是耶則自昔以為葬衣冠皆非
陵也淳熙戊戌四月十一日齋宿祠下同孫
簽判次襄夏察判蹈中自窆石登山披榛荆
至絕頂見其地正平中起大冢前對羣峰下
瞰窆石巍然儼然真前代王者之陵寢也於

是前日之疑始釋因相與再拜喜而賦詩云

幾歲欽文命今朝拜禹陵稽山新雨霽鑑水暮雲凝更
觀玄圭錫懸知四載乘川靈洎河伯千古獲依憑

觀有璋一

壁一
圭二

有感二首

冉冉新華髮颼颼敝黑裘一官方半刺六十已平頭稠
疊耶溪泛崎嶇禹穴游未能江海去聊作稻梁謀

再有淮南亂紛紛幾戰場血腥官道雨骨映野田霜行

陣青黃氣朝廷赤白囊何時洗兵甲四海重耕桑

次韻伯壽兄秋日偶題

漸老良多感悲秋強自寬鬢驚潘掾白衣怯范生寒逕
合荒苔碧窓明落葉丹澆愁須暫醉忍放酒杯乾

夜發曹娥堰

孤燈乍明滅隱約小橋邊野市人家閉晴天斗柄懸秋
深風落木夜靜浪鳴船却憶前年事扁舟過雪川

書堂

每憶書堂好重來又十年征途聊復爾風物故依然松
竹千巖暮雲煙九月天凭欄佳興發欲進剡谿船

九日諸暨道中示興之

客裏逢重九蕭蕭落葉風畧無花對菊但有鬢如蓬蕉
卷新收綠楓旗半展紅登臨語宗武剩喜一樽同

道中口占

出郭及初旭郊原豁寒晴雲淨空既碧霜明湖更清蕭
蕭衆木下杳杳孤鴻鳴安得陶謝手作詩替丹青

空山古寺裏齋宿值冬晴塵囂一何寂心境兩俱清砌
月曉霜色松風夜籟鳴語闌人未寢孤館伴燈青

題隱靜寺

杯渡已仙去茲山餘勝蹤傍雲開廣殿夾道蔭長松幽
澗秋含霧清溪冷浸峰老僧如宿昔一笑喜相逢

訪何茂恭於南湖何有詩因次韻

相別三年久相逢一笑時眼邊無俗物袖裏有清詩山
路梅花早湖天雪意遲不眠成夜話寒月在疎枝

卽事

亦好經年別歸來意轉親
橫斜花練練清淺水鱗鱗
又逼瓜時戍聊娛戲綵身
新添蘭桂圃近在岸西湑

紫笑

表裏俱穠紫冬春獨擅青
每蒙天一笑

德壽最喜此花

不與素

同馨風味撩吟筆芳菲入畫屏
幾番饒睡思聞此灑然醒

雨餘

雨餘平野綠耕種滿東臯處處鞭黃犢家家賣孟勞筠
盤餽糠粃瓦盃薦溪毛所願甘霖足梁間掛桔槔

謝趙昌父投贈詩卷

趙子有新作鼎珍初出庖端能工競病寧復費推敲白
戰應難敵清臞亦任嘲風流前輩盡試合續絃膠

三月六日湖上分韻得山字

刺漲三篙水寬圍十里山垂楊飛舞裏細雨有無間把
酒從杯溢題詩任鬢斑青春仍暇日莫惜晚西還

三月二十六日工部宿直

邃宇近霄漢微風搖竹梢漏聲通五夜鐘韻自三茅衣
袂偏宜睡杯單詎用庖夙興那敢後雞唱已嚶嚶

題秀野堂

秀野臨空濶三堂若是班荷香平入座湖影倒涵山魚
鳥丹青裏雲煙水墨間他年儻同社應共狎鷗間

奉酬鮑仲山機宜見贈

四海今詩伯才名許孰儔波瀾掩顏謝步驟到曹劉婉

畫參機幕精忠動冕旒時危須戮力談笑復神州

次韻陳魯望郎中

筆底詞華盛寧論大小山敷腴建安際古澹正元間未
許窺三昧時容見一斑草堂詩律在風味喚仍還

溫泉

招提閤林麓棟宇壓江郊來作溫泉浴如逢癢處搔綵
衣臨砌檻華髮對尊匏一笑涼風起紅歌荔子梢

曹務拘綴不及赴張持荷賞梅之約因得小詩

寄似

渺渺煙波濶南湖在帝城梅將春共早人與境俱清
筆墨探三昧樽壘有四并未能乘興去遙望目增明

題郭邵州同塵庵

榮辱酣歌裏賢愚睡眼中未應分野馬那復障西風
晏坐從凝席揚鞭任軟紅巖棲兼鼎食處處不妨同


臘八日雪參議林郎中有詩因次韻

玉樹參差見銀花子細看淖糜分臘序圓炭度朝寒

參議

餉臘粥府
公分國炭
冉冉頭新
白匆匆歲
又殘聊憑
一杯醉忍
把

兩眉攢



欽定四庫全書

集部

香山集卷七至十

詳校官庶吉士臣翁樹培

主事臣呂雲棟覆勘

騰錄監生臣溫廷鑑

騰錄監生臣朱起鳳

欽定四庫全書

香山集卷七

宋 喻良能 撰

五言律詩

次韻李大著春日雜詩十首

春晚饒芳景
官閒得細看
隔窓黃鳥並
開卷壁魚乾
過雨蒼苔濕
迎風翠竹寒
髮華搔更短
斗酒自相寬
漫仕歎遲暮
卜居城北偏
已教山白石
祇欠沼清泉
簾透一簷月
窓橫數尺天
雜花還映竹
故故自芳妍

賤子知何幸菜衣老更斑白頭居杜曲清夢到香山

余所

居山名

琢句愁雕腎銜盃喜渥顏此身慚暮翼飛倦未知

還

偏親須寸祿匠院敢辭留頗媿花經眼還應草喚愁身
唯親布被交已絕牙籌詩興抽毫足無勞入海求

花日淺明牖竹風低度墻舉頭空弱絮轉盼墮危芳興
遣憑毛穎愁消賴羽觴陰陰繁夏木故里耿難忘

借居仍種菊往往似天隨日味三春酒燈明午夜棋間

臨永和帖細誦建安詩潦倒同中散歡欣似啟期

帝里春仍好風和晝漏遲但懷三釜樂遑恤北山移
老大諳斑戲空疎媿色絲平生杜陵老耿耿寸心知

屯雲初解駁曉日有晶輝城郭紅塵軟江湖春水肥
小舟浮綠淨芳徑步熹微起我故山思多慚未拂衣

素髮已垂領故園猶未歸鳥聲思磴道柳色憶荆扉
嫩綠枝邊暗殘紅葉底稀幾多新乳燕一一出巢飛

二載違粉社全家客帝都濁醪充上頓清俸付中厨
親

老唯須養皇恩詎敢孤逍遙處山澤未忍學仙臞

次韻王龜齡春日湖上

春老花茵積雲開天鏡磨暖風今日好細雨何來多柳
蔭青絲障湖明金叵羅何時成醉倒煙草藉晴坡

羅春伯以呂居仁集寄似作詩為謝

平生子呂子妙語總關心忽得詩三百端勝書萬金
惜醒睡眠炯炯淨煩襟何以報嘉惠空慚綠綺琴

六月二十二日夜省宿一首

省廬頻宿直何異在承明地峻江聲近風輕荷氣清鬢
毛真騎省詩思小陰鏗記得山村日馳情向玉京

印印詩

有序

予在工部常兼屯虞水三印去歲八月一日
暫攝奉常三日復暫權禮部又兼二印為五
信宿乃生印印故以命之生八月餘而卒今
歲仲秋五日蓋其周晬憶而成詩

印印秀而好明眸冰雪膚逢人賞岐嶷問字識之無若

有萬金藥真成千里駒空花今已矣晬日一長吁

十一月二日與陸明府陳廣文黃使君吳都曹
江廣文同飲於閱中堂修年契也酒後耳熱因
得小詩呈似

菊色猶黃處梅花未發天三山千里客一笑六同年公
等多朱紱予方乏坐羶清談仍痛飲應作畫圖傳

同德坊寓居

天地方搖落江湖入夢思三為京輦客十見歲華移疊

疊金闥直蕭蕭素髮垂殘年飽喫飯細誦少陵詩

檢書偶見故王侍郎嘉叟舊與余倡和之什良
用慨然因題四韻

文字名三世精神運五兵徒看遺墨在却嘆曲池平浙
右頻犀塵江東幾兕觥倡酬今已矣撫卷淚縱橫

挽高宗皇帝詞

扈從浮江日憂勤立極初八年躬甲冑萬國混車書治
定端無競功成自不居休明婉虞舜逸樂夢華胥

天地重開闢，民人拱德馨。
奎文贊元聖，宸翰列羣經。
禮樂盈三紀，光華亞九齡。
龍髯攀莫及，臣子涕交零。

入局言懷

學省清秋好，無塵意趣長。
講餘簾影靜，坐久綵衣涼。
未
有裨王族，真成耗太倉。
顧慚麋鹿質，亦許玷朝行。

寄宋子淵運使

對閣思槐市，成規媿奉常。
六年談笑阻，千里夢魂長。
將
漕衣仍繡，空餐鬢已蒼。
何當奉犀麈，風月要平章。

判院蔡文和子五詩次韻一篇奉酬

病起驚華髮官閒覺素餐文章慚李益名譽羨蘇端老
去觀書嬾愁來避酒難非關作詩苦自爾帶圍寬

黃講書太器見和五詩次韻一篇奉酬

客氈寒莫致官舍總蕭然睡思茶甘外窮愁酒力邊未
成投轄飲時作撥書眠野鶴如雙鬢衰遲祗自憐

獻之大著得予喜賦以詩來謝次韻奉酬

奪袍吟處筆墊角雨餘巾黃絹才無敵青藜杖有神將

乘桓典馬肯受庾公塵老我知何幸窮塗獲卜鄰

茂林見訪有詩次韻奉酬

解鞍揮玉麈疊疊笑談清昨夜燈花喜今朝鵲聲興
同狂祕監詩似老彌明憶昔南臺北相逢蓋始傾

陳彥山寄示新詩次韻奉酬

山園寧厭小閒地只如馨木落長天碧雲飛遠岫青故
人應見憶新詠許時聽句好何勞琢雖搜不用冥

題周希稷清閔軒

之子蘊琅玕幽軒足考槃
龍葱煙翠濕瑣碎日光寒
似向蘭亭見全勝墨本看
是中雖信美未可懶彈冠

喜雪

同雲生舊臘積雪入新春
野色連滄海驩聲動紫宸
峰巒朝掩映樓閣夜精神
莫展山陰畫雖工不是真

贈陳宣幹

嗜古心仍切尋詩句益工
十年江左別一笑日邊同
補外吾天幸懷歸子道東
好為旬朔款解榻待春風

侍親由三山還東陽

南雪不到地玄冬偏滿山
春風仍料峭綵袂正爛斑
廣廈千間靜虛空一宿閒
此身如羽翼飛倦始知還

文舉仙尉以詩寄以兼惠新安紙乳洞茶次韻

奉酬

閉戶鶯聲老開緘鯉素新
多慚青眼舊遠寄白頭人
佳楮永天繭芳芽雪洞春
著書兼破睡勒謝敢辭頻

題雲黃山寶林寺

彌勒下生地溪山秀且長蕭蕭雙樹碧冉冉片雲黃曉
日觚棱淨西風松桂香十年疎杖屨玉石耿難忘

錦園

孟夏錦園好山花高下開風歌紅芍藥雨重紫徘徊衣
染香邊藥屨粘綠處苔鶯歌兼蝶拍時送掌中杯
山園多勝踐繚繞磬湖濱畦藥青生甲湖波綠動鱗鵝
鳴知欲雨鴉舅報將晨却憶京華日長懷浩蕩春

題何茂宏茂恭林堂

華堂閼林樾林秀水泉甘野色袁家渴秋聲鉅鉅潭二
難今有此四者許誰參他日承明直懸知憶翠嵐

月桂堂

月桂堂何有池清桂影橫畫圖寧辨此玉斧巧修成入
夜境逾妙纔秋風又生饒陽巖石下隱約欠分明

上饒有巖

如月巖中一樹
如桂名曰月巖

廿五兄宣義見招偕諸弟赴新亭宴集即席有

作

瀟洒新亭好松長桂亦稠
清秋集鴻鴈暇日勸觥籌
既遠含香直何辭秉燭遊
主人情義重終宴不知休

錦園雙桂植之二十八年未嘗著花今忽盛開

紫趺黃蘂所未曾見喜而賦詩

疇昔栽雙桂于今四七秋
紫趺香冉冉金蘂色浮浮
標致殊他桂風流最蓐收
無才強摹寫著語故難遒

八月十三夜仲季二弟弄月亭對飲

今宵端正月故故向湖山
玉兔窺杯凸冰娥怪鬢斑
詩

情角里逸酒膽夏黃慳興罷度橋處天風松桂間

次韻程觀過夜飲靈濟祠下

松月瀉清影爐煙凝宿雲檠燈寒照席樽酒細論文清
漏轉三鼓芳杯醕十分絕勝銀燭裏妙舞看榴裙

送朱師古少卿歸蜀

西蜀多賢士于今見奉常十年方出守萬里好還鄉峽
水冬無險河圖晚有光臨歧分手處政爾不能忘

丞相王公挽詞

炎統中興日淳熙翊贊功憲邦同吉甫待旦類周公一品恩榮重三朝禮貌隆欲知勲業盛請眎鼎彝中

維嶽鍾英粹興王有俊良文章周衛武書考郭汾陽調燮民庸茂彌縫主道昌中台一宵圻四海淚滂滂疇昔翹材館疎庸獲屢游袞衣無傲色吐握有勤求輔弼十年久雍容片善收至今天下士語及淚交流

丞相大資葉公挽詞

雙谿鍾地識一相破天荒道至黃扉重勲由紫府昌堤

成歡百辟台圯泣羣方盛烈銘鐘鼎千秋耿不忘
德望堂堂重威名凜凜寒三年衮衣粲四海寸心丹綠
野悲裴度蒼生憶謝安白頭賓客在慚痛淚闌干

挽商元鼎

舉世方貪祿斯人祇自怡一官如涕唾半世足遨嬉心
地陂千頃生涯酒一卮唯應郭有道吾不媿為碑

挽黃泰之

漢世無雙價皇朝第一流文章驚北闕名譽滿中州槐

市師模邃蘭臺史筆適所嗟時未合不作濟川舟

挽樓士特

平生易諸子向我獨拳拳雪屋傾銀筆春風並錦韉笑
談多竟夕契濶未經年來作生芻莫淒涼涕泣然

挽唐立夫舍人

才名振西蜀老氣益中州草制追盤詰籌邊動冕旒已
令榮壓角復遣飲遨頭千古九江恨長隨逝水流

挽石似之郎中

幾作儒林冠親承帝渥隆雙旌大江左一節古吳中列
宿英聲在浮雲舊事空無從挂吾劍老淚濕西風

挽國史侍讀李公仁父

大名垂宇宙秀氣發岷峨學比淵雲瞻才方賈馬過九
朝資直筆二子振賢科已矣流芳在千秋保不磨

挽處士陳容

乾坤身老大邱壑跡委蛇不枉安車召誰為薦鶚詞平
生五千卷身後寧馨兒他日編遺藁應多感遇詩

歷數鄉閭老誰知德齒尊無心游魏闕有意樂丘園漫
不霑三釜真堪映九原涕洟歌楚些已矣莫招魂

挽李靖少傅夫人

九月初光急山川苦霧迷卜邨新隧啟度輦短簫齊寶
劍知終合靈蟾已隕西松門來會葬車馬幾千蹄
板輿曾至鄭靈輅此歸周靄靄雲將夕亭亭月正秋九
原開祔穴故土覆新丘歲晏寒松下茅苦孝子留

挽湯丞相漢國夫人

七秩芳名盛于今等逝波承天登宰輔看子掌編摩鳳
去青春獨鸞回紫誥多他年彤管史兼述采繁歌

欽定四庫全書

香山集卷八

宋 喻良能 撰

七言律詩

春水

磬湖春水夜來生
曉起雷聲逗雨聲
去馬來牛心莫辨
鷓鴣鸕鷀眼俱明
飄零花片有底急
搖曳柳絲如許輕
旬月烟村半風雨
榆錢好為買春晴

次韻送李直弟入越

積雨新晴耳目醒
長堦柳色靜閒庭
已看桃李臙脂濕
未有楊花雪片零
客路汝應懷稚子
家居吾亦念樵青
須知兩地無百里
不用陽關腸斷聽

一室

陰陽一室冷兢兢
燕坐何曾病鬱蒸
只擬綸巾持羽扇
未須赤脚踏層冰
滿盤碧玉初投箸
一榻清風更曲肱
掃地焚香涼到骨
疎簾何處欲揮蠅

記夢

小窓幽閣睡初勻夢到鈞天侍紫宸盤號榴桃真異器
果名黃棗豈常珍殊恩併浹鵠原弟美味初嘗鶴髮親
願竭精忠圖報稱覺來肝膽已輪囷

次韻伯壽兄宿華藏有感

水淨溪空峰更青目雖未到已先明棟浮萬縷晴雲細
軒擁千重夏木清幽興入門應自適殘樽下馬與誰傾
老僧齋罷唯須睡不信人間有月評

曉霽

夜來細雨暗冥冥曉起秋容入畫屏水色淨涵天影碧
林梢微露遠峰青嫩黃稼卧衡從畝老翠柳拖長短亭
一晌西風醒睡眼端如痛飲讀騷經

題繡川驛揖秀亭次張明府韻

一色蒼波百頃煙直楣橫檻覆華椽從來好景無今日
何限清詩似昔賢把醖有山來酒面凭欄無路到愁邊
我來政值雨新足芳草芊芊綠滿川

次韻趙禹平春日書懷

草色青青二月時物華雖是我廬非日明院宇燕相語
花發園林鶯亂飛無數小桃初掩映幾多垂柳自因依
春風十里歸吟筆未用羅幃繡幕圍

八月十四日亦好亭遲月不至分韻得秋字

亦好登臨似庾樓是中風月最宜秋素娥欲赴經年約
行雨潛分一段愁聊復飛觴追勝賞何妨秉燭事清游
明年此夕看明月千里相思楚水頭

次韻衛知機秀才梅花

東君調護亦多情瘦比夷齊徹骨清有韻綠毛時倒掛
無塵白鷺可同盟未應桃葉能稱姊若齒山樊定是兄
何事故園頻入夢疎枝新賞玉谿晴

桐川有玉溪梅
郡中施之圖畫

謝張使君惠簞

瘦玉敲風翠幹長纖成漪浪瑩滄浪封題尚帶鄱江潤
卷贈猶餘燕寢香竹笛當年同秀質桃笙何處避寒光
微軀詎足當珍賜持奉親闈枕扇涼

送張使君

桐川風物最三吳
刺史循良繼兩都
但見賣刀還買犢
誰知有袴本無襦
來時竹馬迎兒輩
去日棠陰遶舍隅
攀斷車轅留不止
他年應作祖張圖

寄題梅山

平生滿耳說梅山
十里荷花繚繞間
宮女三千顏綽約
繡衣十萬綵爛斑
瀕江景好圖難盡
飛鷺詩工語莫刪
定約後期窮勝賞
不辭和月棹船還

寧川

平生滿耳說宣城入境雲煙照眼明過雨偏濃千嶂碧
未秋先冷數溪清細看菡萏波間色時聽綿蠻竹裏聲
不是多才謝公子江山猶解發吟情

再用前韻

晚驅羸馬背重城曉度層巒淡月明醉與別愁相喚醒
秋兼詩思一齊清舞風繁蓼堤邊影泣露寒蛩草際聲
欲駐征鞍聊小憩敢將王事徇私情

秋浦試院奉和馬駒父見寄

也知融帳多餘暇欲往論文偶未遑棄置亡何投轄飲
經營俱下讀書行子雲但覺玄猶白元亮應欣菊已黃
辱贈清詩不知報刺親燈火趁新涼

由當塗回宿齊山用杜牧之韻

一望雲煙興欲飛晴光聊復步熹微幾年想像空懷古
今日登臨自送歸寒菊有花宜靖節澄江如練憶元暉
夜深靜坐清人骨巖影侵堦月滿衣

九日青陽道中呈張主簿

重陽時候在青陽野店山肴對舉觴菊蕊半開簪鬢好
橘包初破喫人香西風有意吹紗帽細雨無情濕錦障
但得一樽相對飲不須更問是他鄉

謁太平興國宮

平生耳滿太平名今日身親謁太平道子畫圖形未泯
廬君山水眼初明雨餘翠滴千峰色秋半寒生萬壑聲
扣石當年開洞府儻容凡骨到蓬瀛

觀門之左有劉越石乃康俗遇僊處

也

八月十五日夜試院翫月呈葉判官徐教授蔡
主簿

西風細逐桂枝生秋月圓從屋角明歡伯向人端有意
素娥於客亦多情試吟飛鵲南枝句更聽春蠶食葉聲
從此塗山添勝事四翁相遇四難并

亦好園梅花

一別經年見未曾衝寒相值意凌兢肌膚姑射仙人雪
品格中山孺子冰清淺池塘春未動黃昏籬落月初棱

從來自倚心如鐵被惱如今似少陵

次韻茂恭元日大雪

逗曉褰幃著綵衣忽驚庭戶有光輝
緩將栢葉隨觴舉細看梅花伴雪飛
阿堵無心來潤屋詩仙有句到柴扉
酒酣笑共兒曹說去歲如今歸未歸
予去歲元日猶攝邑婺源未還侍傍也

柳季修知丞以詩見貽次韻為謝

古木陰陰繞屋廬官居端的似田居
詩清子厚龍城句

字瘦誠懸殿壁書那復有心追四至只應無事富三餘

一樽閒論金壘事為笑紛紛竭澤漁

仲修嘗與予論及前此縣僚以為笑

送交代李丞元舉

藍田松下日棲遲不比韓公作記時鷁首千行攀別淚
牛腰幾軸送行詩我無楚尾歌來暮君有齊民頌去思
自是中年多作惡可堪烟雨話分離

春盡偶書

溪流如帶碧縈紆滿地閒花雜野蔬濃淡柘陰三月暮

淺深山色晚晴初頗驚井落家徒壁却喜盤飧食有魚
蜀魄健啼春又老揮鞭吾亦憶吾廬

題顏范祠堂

聖宋神唐兩鉅人高風勁節許誰倫閨閣自昔宜雙廟
輪奐于今始一新破敵威名優魏國偃藩功業過張巡
後先來作江城守俱障西風避庾塵

宴餞逢寺丞口號

一扇清風自楚臺公堂葱鬱玳筵開旌幢映座千峰日

鼓吹喧天萬壑雷
秋水幾行揮玉箸
春葱十指送金杯
甘棠不獨留遺愛
會見翻為調鼎梅

捕盜至栗洪嶺下道人庵滯留數日遣興

亂山深處小溪隈
夏木陰陰水半回
風岸欹斜對青竹
雨枝低重弄黃梅
濃愁難辦新詩語
吉耗聊傾濁酒杯
戲綵老人須強飯
玉鉤纔吐即歸來

題開先寺

少年魂夢到廬山
今日親遊鬢已斑
聊復揮毫吟紫翠

未妨拄頰對孱顏遙看飛瀑三千丈近去青天咫尺間
不為白雲頻屬念應遊此地不知還

壯觀端宜冠九州未應萬壑敢爭流盡將銀漢為懸瀑
一洗紅塵變凜秋白雨廉纖飛迥野玉龍夭矯下靈湫
廬山處處雖奇絕不到開先未是游

鵝湖寺

在鉛山縣舊名仁壽
院以鵝湖山得名

長松夾道搖蒼煙十里絕如靈隱前不見素鵝青嶂裏
空餘碧水白雲邊氛埃斗脫三千界瀟洒疑通十九泉

五月人間正炎熱清涼一覺北窓眠

水鳥飛來一問津壁宮珠塔便紅塵開基古佛留遺像
直日竒峰列衆賓芋火擁殘知永夜霜鐘遞起嚮初晨
川徒渺渺驅塵駕回首林前愧野人

游西源于白雲峰下煙霏霧靄間逢一女子縞
裙翠袂玉雪可念同遊十有二人遂共酌酒于
大石屏李直第有詩因用其韻

相攜攝履響層巒翠蔓蒼蘿著處攀身在天台秋色裏

路經巫峽暮雲間欲飛還住一仙子似淡如濃雙遠山
笑盡一樽無處覓斷腸霧鬢與風鬟

西禪寺

脩廊千柱壓城陰山並廬山勝二林六月簷楹無暑氣
四時山水有清音鳥飛不盡上方遠鯨吼希聞別院深
更欲題詩發佳境泮林講說總關心

予卧病數日意思殊昏昏中秋強起陪老人把
酒對月不敢濡唇吻思去歲在當塗試院與諸

公飲酒賦詩又一載矣因成長句

楚水塗山各一涯今年還是去年時古來明月皆如此
我試停杯一問之丹桂飄香知有子飛鳥遶樹似無枝
直須看到冰輪昃忍負姮娥隔歲期

次韻戲綵老人重陽懷故園作

瀟灑秋容雨後天丹青端似倩龍眠故園綠竹應今日
異縣黃花又一年微祿祇堪供菽水菲材安敢擬淵騫
日來王事欣多暇聊向樽前一粲然

送閻紫微歸蜀

曲江分袂十年中一笑相逢楚水東
西掖判花知思湧南牆哦竹坐詩窮
秋風但覺舳艫駛畫繡何妨畫戟雄
道過夔門王內史為言雙鬢已如蓬

寄周彥禮知丞樓文舉司理

從容里閤待時須二老風流孰與俱
遷善節香如故否望雲迎月更佳無
醲寒凜凜侵衣袂薄雪斑斑入畫圖
欲把一杯論舊事五年魂夢隔江湖

次韻伯壽兄見寄

江國疎梅吐玉英故園想見木欣榮二年鴻鴈碧雲闊
千里江湖春水生冉冉池塘應入夢瀟瀟風雨若為情
行看戲綵青萱發準擬芳樽相對傾

二月十五日陪府公出郊勸農

雨過郊原草色勻元戎小隊出城闌聊穿阡陌溝塍路
徧勸耜耨襍穡人紅杏梢頭春意好綠楊深處鳥聲新
此行端為劭農設肯學醺酣吐錦茵

陪曹使君牧馬寺勸農

朱轡小隊出郊坰風捲濃陰作快晴
夾道老人迎五馬
嚙枝黃鳥避雙旌參差麥壠雲屯重
零亂梅花雪片輕
勸課定知非小補扶犁攜餉趁春耕

次韻木蘊之狀元見寄之作

水遶星山木遶廬江城孤絕政愁予
鳥言為吏居篁竹
鳥鬼得魚歡里閭照眼梅花寒皎皎
關心煙雨晚疎疎
真山多謝遙相憶長句新詩細字書

登五峰亭望廬山

平生廬阜去無因咫尺于今不得親顧我塵勞四十九

羨他蕭散二仙人

太白四十九游廬山東坡四十九矣

會當拄

頰看山色更欲題詩滿澗濱為報草堂蓮社友掃雲開

戶待游輪

詠月

何年玉斧巧修成半似明生半魄生易使飛鳥來匝繞

難將老蚌較虧盈

吳都賦蚌蛤珠胎與月虧全

桂枝不逐秋風老水

影長隨夜氣清曾是廣寒宮裏客舊遊重訪更含情

陪通守李丈出郊

出郭旌旗及曉晴朔風凜凜水泠泠堵牆野老瞻泥軾
冠劍長松拂屏星破臘梅花強半白先春草色未多青
經行肯為遊觀美王事馳驅不敢寧

曉行霜重如雪

霜重寒威一夜加曉來人迹板橋斜已看白鴈來千里
想見青州滿百花何處菊枝猶復耐故園菊味定堪嘉

慈顏正念征裘薄歸去萱堂笑語譁

挽施州使君鍾公

弱冠為儒世所推中年事業更瓌奇才名屢致諸公薦
讜論深蒙睿主知郡政堅強同薤水行囊蕭瑟似琴龜
只今惟有清江路父老相逢說去思

欽定四庫全書

香山集卷九

宋 喻良能 撰

七言律詩

東歸

無邊春意正冲融
十幅歸帆到浙東
照水杏花紅翦翦
弄晴楊柳綠茸茸
風光併入吟毫裏
山色都歸醉眼中
說與林間子
規道丁寧不必向東風

東歸見梅

老大無堪鬢似銀
虛名猶復玷簪紳
久為碌碌趨朝士
暫作棲棲去國人
行李衝寒歸故里
江梅偷暖報新春
萬鍾於我何加益
三釜新來喜及親

草堂成即事二首

三年留滯江之南
歸來故園寢亦甘
經理草堂唐寶應
耘耔荒徑晉陶潛
寸心自昔似南八
雙鬢只今如謝三
手栽楊柳既合抱
木尚如此人何堪

燕雀桑麻五畝勻
香爐峰下磬湖濱
青衫不礙兩居士

白髮真成六老人

兄弟五人皆二毛
與老母而六也

子美浣花元不惡

淵明栗里總宜貧作詩飲酒真吾事回首江湖懶問津

亦好園即事

誰將春色到山家湖綠平堤草滿沙細刻真酥水仙藥
勻搓絳蠟海紅花芳林得日鶯還囀香徑無風蝶自斜
聊與後生修故事未妨詩酒作生涯

亦好園春晚再用前韻

境淨山明別一家幾多垂柳裊平沙閒中牽夢一池草

空裏愁人萬點花
細雨朝朝兼暮暮
淡烟整整復斜斜
綠陰青子真堪畫
滿意春風磬水涯

經理西山同二客
二弟姪輩侍太孺
人游觀聯

句

西山仍復踞西臺

叔奇

石逕嶽崎此日開

虞卿

竹杖相邀七

八客

季直

芳樽時釀兩三杯

仲文

瀑懸巖腹如飛雨

伯宗

石轉

山腰若隱雷

仲文

敬侍慈顏供一笑

興之

陂陀坐穩興悠哉

直季

春興

日日春泥妨杖藜一聲何處子規啼紅將滿地花空委
綠盡前山草正萋已辦篇章書側理可無杯酒捧柔荑
清明過後芳菲少桃李清陰欲滿蹊

侍太夫人拜掃先塋季直弟有詩因次其韻

東郊雲氣曉疎疎十里相攜霽色初林幄盡頭聞杜宇
苻絲深處見王餘提壺相勸仍沽酒扶杖來觀或荷鋤
不向如臯閒射雉真成一笑粲潘輿

是日荆婦不同
行唯奉板輿爾

次韻伯壽兄中秋翫月

中秋自古月華好，何況浮雲掃碧天。
不比尋常三五夕，須知潋灩十分圓。
畫簷影轉猶宜飲，銀漢輝斜未忍眠。
却憶年時今夜裏，獨將醒眼對嬋娟。

東軒即事

嘯傲東軒得此生，平章物理憶淵明。
晴塘灩灩起萍浪，夏木陰陰求友聲。
聊欲庶幾三不惑，誰能復較四難并。
旋燒蟹眼烹鷹爪，啜罷呼兒課二京。

寄程教授士廓

去年同宴小重陽
香霧霏霏橘半黃
楚尾吳頭雙妙麗
茱枝菊蕊總芬芳
十分滿醕白衣酒
兩袖濃攜燕寢香
回首只今如夢寐
暮雲烟浪正微茫

重陽遣興

秋高身老少陵悲
不獨雲飛鴈亦飛
紅葉色深偏照酒
黃花香重欲沾衣
絕知落帽歡娛好
最奈登山伴侶稀
強挿茱萸修故事
未妨醉眼送斜暉

亦好園江梅變紅仲文季直二弟有詩因次韻
蕭蕭亦好耐寒枝天與風流一段奇刻玉不惟工傲雪
施朱端欲妙凝脂佳人頰頰今纔見公子酡顏頃未知
便好作軒名頓有二難連壁賦清詩

雪中賞橫枝梅花

橫枝梅花最先開影着清淺無纖埃壽陽粧額依然在
姑射冰肌何處來無數雪花新點綴幾番霜鬢獨徘徊
想見懷安官道側十里潔白如瓊瑰

懷安道中梅
林綿亘十里

戊子除夕追和陳簡齋除夜一首

世事年來已飽更百年今夕兩分平
窻間蠟炬偎人煖
餅裏梅花照眼明
瓦屋三間聊足喜
鬢霜千丈總堪驚
明朝同上西山望
應有江湖春水生

次韻季直弟春日雪

休驚雙鬢二毛加
且喜東君發物華
未向林梢開嫩葉
先於簷際舞飛花
鼠鬚正好書春帖
蟹眼偏宜試露芽
便欲扁舟訪安道
不堪山驛水程賒

次韻和夷仲節推陪府公游北山

紅蓮猶得愛青山翠木蒼蘿處處攀
雲水窟中聊假日簿書叢裏暫偷閒
檐帷車乘春同到燈火城門夜未關
我亦林泉曾俯仰只今雙屨又塵寰

題祥符寺靈山閣

一倚危欄已快哉俯看屏障掌中開
江間碧浪循城去天外青山入座來
隔岸幾聲聞鼓角傍林千簇見樓臺
白雲只在孤飛處西望關心首重迴

武夷山

冲佑觀前水紺色昇真洞北山笋攢羣峯不斷四時翠
萬壑長留九月寒溪上桃花引漁子雲間仙犬逐劉安
平生飽識佳山水直作東南第一看

天申節望闕口號

日永涼生殿閣風需雲宴衍慶流虹明良叶德千齡遇
臣妾傾心萬國同葵影緩隨義馭轉榴花高映御袍紅
西踰蔥嶺東遼海長屬堯封禹貢中

試院次韻馬駒父見寄

華髮蕭蕭知更稀
回頭五十四年非
花添病眼正臨卷
春滿故園猶未歸
止酒獨醒陶靖節
寄詩相憶謝元暉
若為比得新篇美
西蜀江頭錦一機

試院七夕

過雨秋風灑客裳
長廊廣廈更清涼
不看雲際癡牛女
細讀文中古戰場
病骨未輕聊把酒
時苦臂疼以酒服藥
詩情欲適旋焚香
敢辭秉燭分清夜
猶記槐黃昔日忙

陳知府體仁和予七夕試院詩併以龍涎數十餅為餉次韻奉酬陳每講會甚盛

八郡經生滿鱸堂那能斗酒博西涼晚年刻意玄虛講
蚤歲留心翰墨場憐我無羶寒坐客分公燕寢舊清香
相逢一笑寧多得歸去匆匆有底忙

司戶李巖詹和予廬山詩二十一篇作詩為謝
東野龍鍾誇白首巖詹矍鑠事清修胸中似有九雲夢
筆下倒傾三峽流和我七言清有味能令三伏凜生秋

當年廬阜賞心處恨不攜公九日游

題馮家洞

空巖寒氣凜兢兢入戶神清思亦澈似應如非聲湏洞
已垂未落石峻嶒深於幽俗藏冰室險過文王避雨陵
刮蘚磨崖書淡墨勝游聊復記吾魯

校官廳新栽巖桂

不將官舍等逆旅故把霜根栽繞牆他日花開暎秋色
何人手折惹天香丁寧護取森森碧想像勻排粟粟黃

顧我疎慵百無取未應人錯比甘棠

叅議李郎中見和次韻奉酬

頃歲題名曲江院及肩曾許亞宮牆
胸中濶貯雲夢澤筆下濃薰班馬香
省直舊霑衾半白除書行見紙新黃
和篇如出少陵手誰謂無心賦海棠

再用前韻呈叅議李郎中

獨冷官曹有底忙經旬不得造門牆
雨添垂柳絲絲碧風攪飛花片片香
顧我摧頽如病頽羨公騰踏勝飛黃

新詩迥出南豐右不是無香似海棠

寄張君玉

橘亭一別五回冬寤寐何曾置此翁二十五聲秋後點
八千里外月明中夫君不寄平安信而我方棲簿領叢
三峽江高天共遠側身西望興何窮

次韻周希稷詠芭蕉

經年不接故人書開戶逢渠了不殊誰運七輪風裏扇
時跳千斛雨中珠退之有意吟山石摩詰無心作畫圖

為愛青青無俗韻故教移植傍庭隅

次韻葉省幹重九樓上言懷

水落魚龍已退藏小樓蕭爽袂衣涼山雲雨過無窮態
巖桂風來不斷香已分文章成白豕擬將富貴等黃粱
嵇康潦倒渾無取豈復眉開一點黃

送洪右史赴召三首

胸蟠補袞五色絲筆驅波濤三峽詞上追班馬真輩行
下視燕許如兒嬉拙工廢繩那足道巧匠縮手今當施

前途着鞭政須急玉堂獨步非公誰

長公前日辭揆塗少公今日被鋒車路人共指拜內相
天子久欲登鴻儒黃麻端擬似經訓金蓮不獨榮傳呼
如聞書詔正填委北轅疾驅公勿徐

月宿南斗窮何遣爬沙脚手鈍可咍一生冰清但糠粃
兩鬢雪白猶塵埃達人疑斂未免按夷途薦藪誰當推
公乎行矣斷國論能忘料理忍窮枚

由建寧回三山道中重陽

征鞍初自富沙還
亂葉殷紅點碧山
客裏黃花驚度節
鏡中白髮巧摧顏
三休磴道惟頻嘆
一飯茆簷得暫閒
為想成均新榜帖
阿奴才力勝黃間

通判孫宗丞分餉溫柑次馬撫幹詠橘韻作詩
為謝

珍果分柑不作疎
李衡千顆直堪奴
初嘗藪藪泉流齒
未摘青青香滿株
可是騷人憐楚樹
只應仙種自蓬壺
龍城當日親封殖
還有霜苞似此無

園中口占

春鉏野鳬疑水鄉湖陰山色仍蒼蒼西風三徑有佳致
朔雪橫枝多暗香長統遊戲自足樂少游贏餘非所望
開林貼石興未已瓜時逼人須趣裝

聞交代將至喜而成篇

三年泮水冷無氈贏得蕭蕭雪滿顛晚景不妨供綵戲
他鄉安敢廢詩篇賸將杯酒澆行色速賃雙童擔近編
任是身歸落鴈後鄉心先抵磬湖邊

府學職事置酒九仙以餞予行

玉友金朋三十三
攜尊相屬向晴嵐
含毫共賦黃初句
揮麈仍追正始談
再用清烟噴白澤
更霏香霧噴黃柑
俊游勝事真堪畫
華髮飄蕭只自慚

鉛山

三月春風暖更飄
滿山嫩綠正嬌嬈
幾聲勸我脫破袴
何處撩人婆餅焦
甘旨僅能供素髮
涓埃未有荅皇朝
吾廬漸近亦堪喜
試把白醪傾綠瓢

中秋終日霧雨予還自都下宿分水嶺夜漏約
七八刻月出烏飯草薦山之東徘徊窻牖間欣
然把酒對之因賦長句

烏飯山邊白玉團瑞光千丈溢清寒斜穿逆旅茆茨室
正照先生苜蓿盤聊向青天思太白却吟飛鵲憶曹瞞
今宵不擬逢明月更向尊前仔細看

重陽詠菊

年年自赴重陽約不待陶家詩句催便欲急呼歡伯賞

未知誰遣白衣來紅萸有韻岳連湛素藥無香賜望回
何事杜陵嗔竹葉却教從此不須開

送伯壽兄之官上虞

平生藝苑筆同耕兄弟須知似友生三載方尋夜雨約
六旬又作越中行舉杯不學銷魂別側耳惟聽報政聲
從此西岡數登眺白雲飛處總關情

時迎侍太孺人同行

賢良馬叔度和周內翰送予倅越詩見貽次韻

奉酬

一鳴一息幾千秋風翼端宜汗漫游筆底珠璣誰得似
胷中雲夢復何求談餘正始人加勝詩比黃初語更遒
西笑定應叅瀑直東游聊復伴遨頭

叔度賢良再用游字韻見貽復次韻謝之

夕郎分閫鎮東秋幕下揮毫秦少游一代風流今不泯
百年文物尚堪求交情莫逆人誰似吟事方殷歲又遒
他日約君為伯仲三間瓦屋住東頭

次韻馬叔度再用前韻見寄

善奕從來數奕秋勝游今作子長游才多已覺懸河似
詩妙無勞入海求盡月裁雲寧底巧奔泉挾石一何遒
誰知傾盖成膠漆笑殺如新到白頭

過嚴瀨寄陸守務觀

翰墨場中老伏波揮毫快馬下晴坡三年睿主恩獻納
千里疲民賴撫摩瀟灑郡齋方在望飄搖征棹未能過
擬求墨妙輝衡宇應有黃庭換白鵝

齋宿淨明寺小飲易安齋口占

淨明齋宿近初庚西蜀東吳一世英行徑九盤山犖确
流泉百折玉琮琤頻飛兕觥顏俱渥細聽犀談座為傾
觴詠直多幽興足未應不飲似公榮

挽縣尉陳元圭

平生自負氣雄豪落筆文詞湧怒濤蚤歲賢闕幾雁塔
暮年花縣未牛刀凜然風義誰能並偉甚衣冠衆所高
我欲臨風新執紼忍於繪事看青袍

欽定四庫全書

香山集卷十

宋 喻良能 撰

七言律詩

題確山梵安寺

確山風物似齊山
誰着精藍亂石間
僧梵四時看紫翠
軒窗終日對孱顏
暫容借榻松風愜
更欲題詩蘚壁慙
老我還思十年事
飛來峰上曉躋攀

鑑湖道中口占

輒輒籃輿鑑水濱
水紋如染草如茵
繁紅零落徐娘老
遠翠低徊西子顰
猶及殘春追勝賞
不妨餘事作詩人
胷中磊砢須澆洗
未厭傷多酒入脣

次韻王龜齡謁大禹祠酌菲飲泉

不到稽山已十年
夢中物色故依然
憶尋絕境經幽寺
曾向東風酌妙泉
書穴雨餘雲撲地
鑑湖春盡水連天
別來喬木高多少
想見嬌鶯自在遷

題東山謝安石故居

江邊瀟灑東山寺知是曾經謝傅游一代英姿餘信史
千年陳迹付東流暮雲初致蒼生恨遠翠如凝妓女愁
好古嗟予生苦晚停橈明月滿滄洲

既游東山乘月登舟至曹娥江

虞江波上一帆風天水澄明夜色空古體詩成巖影裏
新醕酒酌月明中呶啞兩槳止還作欸乃數聲西復東
塵滓此時無一點恍疑身在水晶宮

題歸宗寺

寺因逸少曾為宅，峯自秦皇已得名。
不獨山南稱最古，故應江左號尤清。
路趨絳闕山梁險，奩隱金輪石鏡明。
誰信塵埃倦游客，西風還許杖藜行。

次陸務觀韻題姚復之秀才適齋

姚子神情處處便，牀頭周易杖頭錢。
逢僧與語閒終日，遣客歸休醉欲眠。
應覺此生如寄耳，何妨一室且蕭然。
無心更覓封侯事，納履誰能博一編。

追和陳子高贈王法曹韻

肯學少陵對馬軍肯同太白謝汪倫聊將文字飲一錢
不待月影成三人門前車馬鬧遲日陌上綺羅嬌暮春
想見流觴多樂事酒酣人問斗升嗔

喜待制王丈歸自夔門

三年遙望瞿塘峽獨立西風首重回一騎翩翩飛詔去
片帆渺渺下江來平生不願侯萬戶今日重欣酒一杯
聞道日邊催覲速不須歸路更徘徊

次韻林參議小雪快晴

着地晶瑩月在沙忍寒聊作短歌誇煖肌未辦裁駝褐
露趾唯應有草鞵細點竹梢添爽灑偶經梅蘂映橫斜
何當既積還消後刺取清冷試葉嘉

大雪

山陰境中寒雪飛山川明秀見應稀嚴威不貸乘興棹
餘彩併入繡書帷黃竹應歌姬滿曲素花又舞謝莊衣
東郊薪者寒到骨縱有狐裘那忍披

送王共父

西蜀東吳萬里程偶然相值兩浮萍
黑頭君已登三館白髮吾方醉六經
夜幌論文燈耿耿春堤把袖草青青
餘艖小別須回棹不用陽關腸斷聽

沿檝舟行出五雲關

盡舫朱簾出曉關便風飛過幾重灣
路經僧舍漁村畔身在烟霏霧靄間
驚浪沸晴輸遠浦亂雲拖粉露崇山
偶因王事從心賞詩語匆匆不暇刪

挽周判院

昔年臚唱下彤墀名壓人頭似牧之風動鱣堂昭武日
化行雉徑敬亭時曾無簪筆朝端用何以修文地下為
我老不堪供執紼獨將雙淚逗瑤卮

次韻林明府何主簿唱酬之什

向來十載願識韓一日下車許追攀美句已出黃初右
清談尚餘正始間煩公筆底瀾翻水洗我胸中磊砢山
更挽何郎入詩社三人俱有綵衣斑

林明府攜所和詩見過次韻奉酬

退之初過玉川家春徑無泥草帶沙幾點飛來溪柳絮
一番開盡海棠花窻間細雨青衫濕袖裏新詩醉墨斜
客散酒闌還掩戶可堪明月滿天涯

帥參宴客於蓬萊閣林參議有詩次韻呈府公
久以嘉謀贊邇英暫分東漚慰蒼生閒攜僚吏揮金盞
更遣娉婷吹玉笙霖雨千巖垂欲作孤舟野水未妨橫
匪因袞繡歸黃閣還念知章在四明

次韻王待制劉侍郎倡和

卷十
袞衣猶未趣東歸吳會先傳蜀道詩急峽高江追子美
清風明月笑嚴維花園白帝行春日香藹黃堂坐嘯時
顧我迂疎堪底用強顏新粟效支離

次韻林致甫參議西園宴集

西園瀟灑似蓬丘容我追隨飛蓋游一一娉婷供笑語
雙雙鸚鵡對沉浮堪巖窈窕如天造洞壑清冷與目謀
欲識清歡兼卜夜東山月色足淹留

讀林公懿誠竹軒集次韻卷首一篇

南渡詩流復數誰為虞作樂只聞夔細看出腸穿心句
想見裁雲畫月時此集自應傳異域吾生還恨不同期
先唐作者誰堪並奴僕微之輩牧之

次韻林參議七月七日見示新作

曉雨初過溽暑收微雲澹月作新秋清風政對三休閣
絕景還思八詠樓縑嶺當年乘白鶴銀河此夕渡癡牛
壽觴一舉烘堂樂淨洗胸中萬斛愁

次韻奉酬林明府詠梅

政足廉平詩更佳鐵腸還解賦梅花律傳和靖未多葉
名接水曹今幾家丹粉詎須煩巧妙清新止為寫橫斜
擬攜卷軸江東去乞與詩仙作意誇

時龜齡王
丈在番陽

偶成

寓居東青城北端夏室陰陰簾色寒瓜盤那復集蠅蚋
研沼似欲生波瀾奇奇怪怪石幾壑謾蒼蒼竹數竿
枕扇衣斑自不惡時文思索媿空餐

時文思索尤臻其
極匠院之名蓋取

此諸

裴園小集鄭汝諧同年有詩次韻奉酬

慈恩鴈塔題名處回首端如夢寐中千里遠從當日別
一樽重喜此時同飛騰我久欽公輩潦倒君當恕此翁
異日尚期塵史冊事功那敢廢磨礪

次韻宇文舍人見貽之作

不見褚公今二年重來青眼尚依然偃松篇美天猶和
正殿班清人孰先今日赤墀煩暫立他年黃閣徑須遷
白頭賓客無聊甚只待吹噓送上天

張使君生辰

綠茸紅糝細團枝
天上麒麟瑞此時
風度旻旒嘗見問
威名草木自應知
當年玉燕生燕國
他日金貂侍漢墀
再拜祝公何所似
勝游長與赤松期

讀初寮集呈王宗丞

初寮文律冠中京
晚歲深嚴三折肱
清處月中仍聚雪
高時風裏政搏鵬
家聲不墜推王粲
句法能傳有杜陵
剡作詩文追漢魏
非公誰不關溪藤

記六月二十日湖上所見

羽客相攜六一衆炎歊立變曉涼天陳朝古檜參天瘦
和靖孤墳傍竹偏却向蘇堤剝新芡更尋蕭寺聽寒蟬
長吟小醉歸來晚足底清風似欲仙

六月晦日同樓少府由錢塘門至上竺遂遊下
竺憩冷泉亭塗中記所歷

聯輿緩步踏葱蒼十里荷香雜稻香庚暑此時無一點
秋風明月灑長廊林間巖洞侵衣潤水際亭臺徹骨涼

何處山泉落簷溜
恍疑飛雨曉浪浪

次韻范伯廉機宜病起見寄

夫君自是穎囊錐
何事翻為滄海遺
造化小兒聊戲劇
山林大藥宜無資
得閒因病還應樂
信手揮毫却有詩
休歎銀盃成羽化
會須拔劍撥年衰

來詩序引有盡貨
酒器以辦行計語

中秋示仲文弟

近指揮中秋依重
陽例作假一日

古來佳節是中秋
今比重陽許燕游
已覺冰輪無限好
不須玉斧更重修
三飛驚鵲紛無定
一點閒雲淨不留

況有阿連同綵戲何妨呼酒互相酬

次韻王宮教見貽之什

家住濤江東復東渺然雲浪接晴空半生仕路崎嶇裏
十畝家山杳靄中來往未成三徑樂笑談還喜一樽同
強將俚語賡妍倡曹鄴端慚齒衛風

長至憶天衣舊遊寄王狀元

去年連轡到朝陽紅日初添一線長八俊偶同人已羨
四難俱得計真良澆腸竹葉驚深碧揅鬢梅花啗淺黃

是日迴時馬
上簪臘梅

回首只今深似夢
雲山烟水正相望

次韻奉酬黃泰之狀元見寄

千佛經中第一人
明光前殿奏雄文
論心詎止稱三益
識面端能勝百聞
疇昔清談如扣玉
只今佳句欲凌雲
高情已出蘇州右
未用清香掃地焚

挽吳春卿舍人

出處平生似昔賢
高風勁節凜朝端
回天議論心無歎
脫腕文章世所難
斫鐵叫天蠻獠服
調羹滿鉢里閭歡

定應直筆書英躅留與千秋後代看

除夕

夜永燈明歲又除依然坐冷乏氍毹平生潦倒如中散
大半交游今左符未辦黃精除白髮漸驚玉水點銀鬚
欲論舊事無人共閒把香醪細細斟

過東亭湖

籃輿詰旦過東亭日出烟銷十里平翠袖舞風菰葉舉
紅粧照水藕花生恨無釣艇浮深碧賴有吟毫賦曉晴

歸對老人誇勝賞從今不數鑑湖清

席上

奉常珍重未僚情許以疎慵邁俊英已辦初筵酬物色
更將餘事到詩盟貪吟不惜揮貂筆忍醉何妨釀兕觥
細踏芳菲過腴潤桃蹊紅雨報新晴

送陳給事帥四川

四海繁華一蜀都君王謀帥意渠渠百城赤子煩摩撫
一代長材獲展舒玉壘倚空充屏翰鐵衣如洗護儲胥

袴鞬帕首郊迎處想見旌麾入境初

禮樂詩書一世英碧油青鬢二難并慣看詞翰流三峽
剝有精神驅五兵暫向坤維聊鎮撫却歸天闕致昇平
明年春水如天日綵鷁乘風向帝京

姜春坊以詩編見貽借題雪堂圖韻作詩為謝
紅顏話別浦邊秋白髮同為帝里留壁水庸庸參末坐
春坊鞞鞞冠名流功名君且登麟閣出處吾行具釣舟
餉我一編清似玉五言端的繼蘇州

李大著惠示詩卷次韻首篇為謝獻之

辱贈春容卷軸新懸知蚤歲擅詩聲
千林有韻霜風勁一點無塵霽月清
細味班香兼宋艷自慚白俗與元輕
欲哦惡語賡妍倡一夜昏花對短檠

史丞相生辰

姓名久已覆金甌一品師臣德業優
黼展尚詢黃髮舊衮衣難伴赤松遊
松筠勁節高三事桃李濃陰徧九州
蕭葉楊門端可繼只今衮衮富公侯

長才蚤立太平基，與學曾為帝者師。
謀叶不資同列斷，規存長許後人隨。
金魚玉帶今誰似，橘綠橙黃景最宜。
再拜祝公千萬壽，三江細酌入瑤卮。

洪右相生辰

鳳將南呂入簫聲，節近中秋協氣橫。
玉燕呈祥生碩德，金甌覆字佐昇平。
望同北斗泰山重，操與秋霜烈日爭。
昨夜清臺占越分，中台星帶老人明。

黃閣調元鬢未霜，秋應書考似汾陽。
懇辭閭闔沙堤路，

暫樂蓬萊燕寢香茂烈未饒周叔虎英詞寧謝漢班揚
會看繡袞重催起快卷三江入壽觴


次韻和宗郎中秋不飲

暮烟收盡玉盤生是處同欣此夜晴雲斷三山凝紫翠
星稀萬里湛虛明低臨朱箔千尋白高並銀潢一派清
賴有綵衣堪醉舞殘樽深夜更重傾

挽司理奉議樓公

老爛為儒山澤臞半生辛苦就名譽三千白髮身無事

一點青燈夜讀書真率杯盤如洛會
崎嶇巖壑似陶廬
欲知老淚揮難盡灑徧霜颿更濕裾



欽定四庫全書

集部

香山集卷十三

詳校官庶吉士臣翁樹培

主事臣呂雲棟覆勘

騰錄監生臣朱起鳳
騰錄監生臣龍舜珩

欽定四庫全書

香山集卷十一

宋 喻良能 撰

七言律詩

次馬撫幹韻贈黃泰之狀元

裊然射策向明光
紫禁春深日正長
風細御爐烟冉冉
天晴宮柳絮茫茫
玉階親奉唐虞問
綵筆濃薰班馬香
千佛經中名第一
鴻文端不數長楊

次韻王侍御題詩史堂

欲識當年泣鬼神詩皆絹婦與螯辛洗空千古無凡馬
稱到於今有幾人肯與齊梁充後乘只應蘇李是前身
豐碑更著最佳處傳示宜過一萬春

十月二十三日攜家遊裴園

筇輿趁曉踏銅駝休暇仍逢景色和閒挈壺觴游翠靄
盡呼兒女看滄波茫茫烟渚羣鷗下隱隱晴虹短棹過
最是春奇絕處梅花破萼未全多

謝中書施舍人宴集

紫微高義篤同年
邃宇開筵近臘寒
綠醖醅濃粘玉琰
紫駝峯美照金盤
醺酣上頰生春意
文字清談卜夜闌
更辱盤飧餽黃髮
顧慚珍報乏琅玕

試諸生直廬書事

長日初隨綵線還
陰陰簾幕曲欄干
白袍三百近洙泗
青桂兩株如廣寒
下筆萬蠶爭食葉
為文三峽瀉驚湍
誰知潦倒真無補
不媿無羶媿素餐

安撫大資李參政生辰

十二月十四日

仙李盤根幾百秋我公勲業比伊周推恩已解宏元化
戢患猶能庇七州不日定為黃閣老他年應伴赤松游
三江願得渾為酒壽筭年年給獻酬

崧嶽生申占臘前預將和氣作春妍蟠桃結實三千歲
蓮葉成巢幾百年聊向蓬萊開燕寢即紆袞繡畫凌烟

貞觀功臣皆生
畫像凌烟閣

只應便是神仙事方丈瀛洲却未然

次韻宋嗣宗梅花

野外江頭一樹垂正當霜後臘前時清如弘景松臨閣

韻似淵明菊映籬鐵石廣平魯作賦風流水部亦哦詩
却愁折向粧臺下莫遣佳人取次知

洗盡紅粧見玉顏一年相別此時看房陵粉水休爭白
姑射冰肌巧耐寒自愛一枝橫竹外未須千樹繞江干
東風也是相欺得已作和羹一點酸

次韻謝察院田寺丞倡酬之作

兩翁辭采偶同時春草還應夢謝池出月穿天端有意
掀雷抉電豈無期推門不作孤吟苦擊鉢猶嫌得句遲

顧我無才難入社焚香時許誦清詩

平湖

平湖潏潏浸葱蒼畫出風烟十畝強
密曲六從霜後熟玉芙蓉向露中芳
新開石洞連松碧低結萸房映菊黃
最愛隄邊秦地柳一回春到一回長

思歸

五載懷歸不得歸故園想像每依依
蠶生村落桑黃長麥熟田家稚子肥
谷鳥緩歌金縷曲籜龍渾著老萊衣

一篇未就張衡賦漫向成均詠式微

挽周子及

灑落孤標迥不羣
宵羅星宿富多文
兩科擢第未為貴
八事籌邊堪策勲
鯁亮諫辭端似賈
崎嶇宦路僅勝賁
我慚不執雲溪紉
空望雲溪溪上雲

顯謨左司周公元吉將漕湖北一時名流賦詩
餞行予與左司同出於詹事周公之門為同門
同居班列二年為同朝同考類試於貢闈為同

寮三者既同契好彌篤於其行也作長句以送之

微雲疎雨涼新秋皇皇玉節摻不留夫君不憚原隰險
聖主坐寬宵旰憂巴音聊復祖行色楚水恨不尾仙舟
籍籍預傳新漕輓汗青未數富民侯

黃泰之郎中以潮陽詩見貽次韻一篇奉酬

千里潮陽喜政成五年重會帝王城尺書不寄頭俱白
一笑相逢意已傾輝采共看新列宿風流猶記古州瀛

詩編總是驚人語怪得年來太瘦生

贈樓尉

誰識尊前戲綵身鬚髯如棘鬢如銀久為朝士空餐甚
又見秋聲滿耳新元亮祇思三徑樂子雲何事九衢塵
襟期蘭契如君少未可匆匆動去輪

挽提宮知丞周公

妙齡馳譽滿東吳落筆驕騁走坦途四十年來鳴道學
一千人內最羣儒

甲子鄉舉用經術以書義試者千餘人公為之最

二松不負

經綸志三選真成隱遯娛老我與君端莫逆遺文時閱
漫長吁

送曾大卿將漕江東

公去何嘗負二宜要持玉節瑞明時江畿列郡皆爭睹
臺閣名流總賦詩鵬鶚暫為雲外舉鳳凰終集上林枝
近臣侍從多虛位會見回帆春色隨

悼吳居厚

學問從來著月評慈恩何事欠題名賢哉難老堂雖就

惜也陳情表未成疇昔幾回同把酒於今一涕獨霑纓
張公當日稱操履江漢傷心晝夜傾

由之流溪回亭午苦熱小憩牧馬寺

長途畏日欲流金聊向招提覓快襟翠合苔痕人寂寂
涼生栢影院深深苦無俗物敗佳思况有寒泉醒客心
一餉清風寄蘄竹又飛征蓋指城陰

九日偕成均同官北山登高二首

輕霞朝日兩微茫沙路駸駸十里強照水有情楓葉赤

倚崖無數菊花黃興酣爭舉凌雲筆醉熟重浮滌海觴
明日蝶愁人亦懶未須歸去苦匆忙

之官括蒼道出涵碧因題四韻以繼賓客劉公
之後塵云

平生性僻耽山水不願加封萬戶侯但得雙魚長到眼
未須萬壑更爭流只今奇絕齊三洞自昔流傳徧九州
記得當年小盤礴坐令炎赫變清秋

再遊東陽

十年不到還重來往事一夢真悠哉尋幽已訪涵碧寺
乘興欲上吳寧臺蒼松怪石雖飽覽黃鈿拒霜猶未開
白雲西來入我念又馭兩腋清風迴

松峭山傍偃松昔嘗過之為賦長句今三十有
六年矣復至其下慨然有感因次韻

人日肩輿度曉峯長松偃蹇倚晴空幾年不見根如鐵
老境重來鬢似蓬獨樹未須誇老杜五楸那復論韓公
青幢翠蓋貌難似想見霏霏烟雨濛

遊下巖過松峭祠傍偃松又賦長句

誰將秋色替雲峯萬里炎歊一洗空
細雨復青池上草西風頓白鬢邊蓬
聊同吾黨二三子來訪山中十八公
更擬夜深乘月到要看香霧共冥濛

州宅

古栝提封接日畿專城皓首有光輝
全家飽煖君恩重屬邑豐登公事稀
一簇樓臺居洞府四時風景對屏幃
多慚郎省無裨補丐外猶能占翠微

次韻奉酬王給事見貽之什

誰知州宅似精廬
山繞簷楹水繞除
堂靜惠風長細細
樓高烟雨又疎疎
貧如坡老工餐菊
性似邊韶懶讀書
賴有嵩山王給事
作詩貽贈問何如

簽廳落成爲賦長句

幕中英俊許誰先
一一驂騑擬着鞭
老我漫誇森畫戟
夫君端稱泛紅蓮
鳩工已見成輪奐
載酒何妨醉聖賢
聞道公餘多暇隙
定持椽筆簡雲烟

對廳口號

歡聲喜氣溢黃堂
解慍風清化日長
簪綬盡傾千里目
冕旒遙祝萬年觴
韻敲碧玉檀
藥嫩色關紅粧
菡萏香
共慶龐恩新浹洽
聖君文母壽無疆

十一月十日同幕府諸公游郡圃葉撫屬得梅
花一枝馬撫屬有詩因次韻

橫枝十月要清詩
南國今年爾許遲
夢繞故山千疊疊
眼看新萼一枝枝
欲知影瘦香微處
未稱天寒日暮時

却憶玉溪當日樹淺霜深雪總相宜

次韻木蘊之狀元義烏道中一首

奔走塵埃老未休每思上下兩巖稠

義烏有上稠巖下稠巖

關心

簿領三書考回首家山兩換秋
搢腹自憐鷁鷁小江湖誰計鴈
鳬留又遮西日長安去慚媿
平生馬少游

送黃機宜叔愚歸省四明

灑落孤標第一流笑談傾座氣橫秋
聊參機密東州幕

曾與風流玉局游

黃自言及見東坡

聽雨忽驚形夢寐臨風那

肯更遲留橘堂想像多佳致恨不追參李郭舟

聽雨橘
隱公軒

名堂

愛山

公子漫誇金谷富先生祇愛玉川貧
山中矯矯七君子堂上皤皤四老人
時引壺觴聊自醉肯教鵝鴨惱比隣
深紅淺白兼穠紫看取林園十畝春

彥禮知丞上巳過訪流觴於愛山之曲水

年來曲水競流觴元已夫君訪草堂
波撼石麟杯斚亂

風翻花片笑談香
哦松適意清篇富
閑戶端憂白日長
更約來年春好處
重來相與醉滄浪

次王待制維舟弄水亭韻

萬里浮江更絕湖
扁舟東入雪川圖
莫言舊菊荒三徑
須信中流待一壺
今日詩筒煩遠寄
昔年樽酒記相呼

待制昔嘗惠詩云
樽酒相呼恨不多

立朝大節人能說
月在清天影自孤

三月二十四再到永祜陵

扁舟投曉出重城
春浪初肥綠滿汀
竹裏幾聲泥滑滑

河邊十里草青青人家艾葉驚飛燕水面楊花點翠萍
漸近昭陵佳氣集五雲松栢喜重經

巳酉中秋

磬湖秋半溢清波一歲月明今夕多剌辨新詩娛老境
滿傾太白醉冰娥一天風露寒衣袂舉室兒童雜笑歌
不是鉅潭奇絕處未妨丁夜更娑娑

盆池

小鑿方池供醉吟纔添斗水浪偏深瑩心未數寒泉井

明日何須寸碧岑樹影落時清浸玉魚鱗動處細浮金
年來點檢曾經汲唯有澆花趁日陰

中秋愛山翫月

年年秋半在長安今夕園林且盡歡一笑團欒人似月
十分潋灩酒生瀾徧簪丹桂香巾袂盡吸清輝澡肺肝
飲罷月斜吟興動揮毫風露一天寒

次韻何茂恭重陽前二日見過

西風籬落興悠然秋影橫江鴈貼天短髮未成吹帽飲

高吟先贈把茱篇
黃花一笑小重九
青眼相看又四年
欲試烟波釣竿手
南湖同上月明船

磬湖之側累拳石
為山巖谷幽邃有
巫廬台雪之趣
因成短篇

背湖臨檻碧崔嵬
萬壑千巖咫尺開
坐覺巫峯天際落
忽驚廬阜眼中來
地偏未害心還遠
潭小何妨水自回
竟日相看兩不厭
老夫真箇似童孩

次韻奉酬參議林郎中見貽之作

紫宸疇昔幸同朝去國俄驚數舍遙
輕細難沾時服賜
氤氲正想御香飄
年加賴有斑衣戲
心靜真同桂隱招
龍瑞此時探禹穴
天津何日渡京橋

自題木假山

根幹輪囷蔽馬牛何年飄泊寄滄洲
幽巖邃壑漁罾得
百巧千奇雲浪鏤
好喚老泉來作記
肯將居士與同遊
畢宏韋偃丹青妙
畫得天然意緒不

次韻奉酬茂恭送茉莉重臺白蓮

異暑歎然金欲流縞帟練幌兩宜秋笑他山谷誇黃鈿
欲學令狐賦白樓粉筆有心爭試巧紅粧無面可障羞
明來自足映茆屋況有詩輕萬戶侯

亦好園海棠秋開紅英滿樹

微雲澹日映寒流畫出西園一幅秋白帝幻成紅玉蕊
金風吹綻碧枝頭睡餘艷艷真妃子夢罷惓惓一解愁
熟賞細看須着句為君重賦紫綿揉

後蜀潘炕有美妾
解愁其母夢吞海

棠花藥而生
頗有國色

次韻張持荷桂花

別駕風流繼竹林名園幽榭水雲深
勻鋪葉底森森碧細糝枝頭粟粟金
酒酌香浮杯面蟻詩成霜灑月中砧
清芬冉冉仍多韻不比晴窗一穗沉

庚戌中秋病起言懷

病來十日不飲酒起對中秋良可人
銀漢迢迢清未了金波潋潋淨無塵
艷歌未暇成三疊美醞何妨釀十分
記得昔年當此景厭厭夜飲在成均

乙巳中秋芳潤軒
翫月飲酒甚適

九日亦好園小集

疎雨蕭蕭岩桂香
西風驅冷作重陽
池塘秋草還爭綠
籬落寒花未肯黃
又是一年新度節
何妨九客共飛觴
園亭低小殺
疏陋不比龍山吟帽狂

雪

密雪乘風逞素肌
穿窻透隙入簾幃
漫空隱隱瓊瑰屑
亂眼紛紛鷗鷺飛
三客新成梁苑賦
六花又舞謝莊衣
回思拜表明光罷
攜得香烟滿袖歸

長風永夜攪青冥曉起寒光亂眼疑回旋舞空端入盡
飄蕭着水自成冰松篁被練三千士岡阜瑤臺十二層
茆舍倍添薪火費只因無事讀書燈

題淵明祠堂

案此詩以下二首據
南宋名賢小集增入

宅邊雖有五柳樹歸去已荒三徑園平生胸中羞五斗
偶爾城市羨華軒盈樽濁酒自可漉得趣古琴那用絃
欲知耿耿忠憤意甲子斷自永初年

輦下言懷

馬蹄重踏帝京塵七載江湖飽問津白髮有人疑甲子
清齋無日不庚申不才詎敢誣明主厚祿那能羨故人
乞得泮宮閩粵去未妨閒處著吾身